



AN ROINN DLÍ AGUS CIRT AGUS ATHCHÓIRITHE DLÍ  
DEPARTMENT OF JUSTICE AND LAW REFORM

## **Rialuithe nua Frithsciúrtha Airgid agus Frithmhaoinithe Sceimhlitheoireachta** **An tAcht um Cheartas Coiriúil (Sciúradh Airgid agus Maoiniú Sceimhlitheoireachta) 2010**

### **Fógra Tábhachtach do dhaoine a bhfuil na gnóthaí seo a leanas á seoladh acu**

- Iníúchóir, Cuntasóir Seachtrach nó Comhairleoir Cánach Seachtrach
- Soláthraí Seirbhíse Iontaobhais nó Cuideachta
- Club Comhaltaí Príobháideacha ina seoltar gníomhaíochtaí cearrbhachais
- Aon duine atá ag trádáil in earraí lena mbaineann íocaíochtaí, leis an duine in airgead tirim, de €15,000 ar a laghad san iomlán

#### **1 Cuireann an tAcht oibleagáidí ar réimse leathan “daoine ainmnithe”, lena n-áirítear na daoine atá liostaithe thuas, i ndáil le rialuithe sciúrtha airgid agus maoinithe sceimhlitheoireachta.**

Is de ghnó daoine ainmnithe iad féin a chur ar an eolas go hiomlán faoina n-oibleagáidí faoin Acht agus faoi na pionóis i leith neamh-chomhlíonadh. Cuireann an tAcht d’oibleagáid ar “daoine ainmnithe” na nithe seo a leanas a dhéanamh:

- custaiméirí a shainnithint agus Dícheall Cuí a dhéanamh do Chustaiméirí i ndéileálacha gnó,
- idirbhearta amhrasacha a thuairisciú don Gharda Síochána agus do na Coimisinéirí Ioncaim agus
- nósanna imeachta a bheith i bhfeidhm acu chun sciúradh airgid agus maoiniú sceimhlitheoireachta a chosc, ar a n-áirítear coimeád taifead, oiliúint foirne agus rialuithe cuí a choimeád.

#### **2 Soláthraithe Seirbhíse Iontaobhais nó Cuideachta (SSICanna) a údarú – Leis an Acht tugtar isteach ceanglas údarúcháin chun gnó Soláthraí Seirbhíse Iontaobhais nó Cuideachta a sheoladh. Ní mór iarratais ar údarú a dhéanamh faoin 15ú Iúil 2010 ar an bhfoirm oifigiúil\*. Cion a bheidh ann gnó Soláthraí Seirbhíse Iontaobhais nó Cuideachta a sheoladh gan údarú ón Aire. Beidh táille iarratais i bhfeidhm.**

Mínítear seirbhísí Soláthraí Seirbhíse Iontaobhais nó Cuideachta mar a leanas:

- a cuideachtaí nó comhlachtaí corpraithe eile a bhunú;
- b gníomhú mar stiúthóir nó rúnaí cuideachta faoi chomhshocraíocht le duine seachas an cuideachta;
- c socrú a dhéanamh go ngníomhódh duine eile mar stiúthóir nó rúnaí cuideachta;
- d gníomhú mar chomhpháirtí comhpháirtíochta nó socrú a dhéanamh go ngníomhódh duine mar chomhpháirtí comhpháirtíochta;
- e oifig chláráithe, seoladh gnó, seoladh comhfhreagrais nó riaracháin nó seirbhísí gaolmhara eile a sholáthar do chomhlacht corpraithe nó do chomhpháirtíocht;
- f gníomhú mar iontaobhaí iontaobhais nó socrú a dhéanamh go ngníomhódh duine eile mar iontaobhaí iontaobhais;
- g gníomhú, nó socrú a dhéanamh go ngníomhódh duine eile, mar scairshealbhóir ainmnitheach do dhuine seachas cuideachta a bhfuil a hurrúis liostaithe ar mhargadh rialáilte.

Ní bheidh feidhm ag an gceanglas údarúcháin seo maidir le daoine a bhfuil a ngníomhaíochtaí SSIC cheana féin faoi réir maoirsiú nó rialáil ag an Rialtóir Airgeadais, comhlacht cuntasóireachta ainmnithe, Dlí-Chumann na hÉireann nó Ardchomhairle Bharra na hÉireann.

#### **3 Clubanna Comhaltaí Príobháideacha agus gníomhaíochtaí cearrbhachais – Tugtar isteach leis an Acht ceanglas do dhaoine a stiúran clubanna comhaltaí príobháideacha ina seoltar gníomhaíochtaí cearrbhachais, i leith na ngníomhaíochtaí cearrbhachais sin agus ina leith sin amháin, clárú leis an Aire Dlí agus Cirt agus Athchóirithe Dlí. Ní mór clárú a dhéanamh faoin 15ú Iúil 2010 ar an bhfoirm oifigiúil\* (féach thíos i gcomhair mionsonraí).**

Is é an tAonad um Chomhlíonadh Frithsciúrtha Airgid (ACFA) de chuid na Roinne Dlí agus Cirt agus Athchóirithe Dlí a dhéanfaidh na feidhmeanna seo a riaradh.

\*Tá tuilleadh eolais faoin Acht, mar aon le foirmeacha iarratais le haghaidh SSICanna/Clubanna Cearnbhachais Comhaltaí Príobháideacha, le fáil ónár suíomh gréasáin <http://www.antimoneylaundering.gov.ie> nó trí ríomhphost a chur chuig [antimoneylaundering@justice.ie](mailto:antimoneylaundering@justice.ie)